

**71 individu ditahan ingkar arahan PKPP - Ismail Sabri
Astro Awani
02 Julai 2020**

KUALA LUMPUR: Polis Diraja Malaysia (PDRM) telah menahan 71 individu pada Rabu atas kesalahan ingkar arahan Perintah Kawalan Pergerakan Pemulihan (PKPP).

Menteri Kanan (Kluster Keselamatan), Datuk Seri Ismail Sabri Yaakob berkata, daripada jumlah itu, 29 individu telah direman manakala 42 lagi telah dikompaun.

"Antara kesalahan ingkar arahan PKPP termasuk aktiviti karaoke atau pusat hiburan (12), aktiviti pub atau kelab malam (4), aktiviti refleksologi/urut (7), aktiviti dengan melibatkan kehadiran orang ramai yang menyukarkan penjarakan sosial (34) dan aktiviti yang melanggar SOP (14).

Task Force Operasi Pematuhan PDRM membuat 67,229 pemeriksaan pada Rabu bagi memantau dan menguat kuasa pematuhan Prosedur Operasi Standard (SOP) PKPP. "Sebanyak 4,248 Pasukan Pematuhan yang melibatkan 16,615 anggota telah membuat pemantauan di 4,117 pasar raya, 5,819 restoran serta 2,008 penjaja, 1,517 kilang, 3,881 bank dan 1,016 pejabat kerajaan.

"Juga 1,263 terminal pengangkutan darat, 234 terminal pengangkutan air serta 120 terminal pengangkutan udara telah dipantau oleh Task Force Operasi Pematuhan," katanya dalam kenyataan di sini, pada Khamis.

Dalam pada itu katanya, PDRM telah membuat 66 Sekatan Jalan Raya Operasi Benteng di seluruh negara dan memeriksa 41,775 kenderaan bagi mengekang kemasukan pendatang asing tanpa izin (PATI) terutamanya di lorong-lorong tikus.

Tambahnya, PDRM telah berjaya menahan 16 warganegara asing kerana kesalahan imigresen.

Katanya lagi, pada Rabu, sebanyak 15 operasi sanitasi meliputi 13 Zon di 4 buah negeri antaranya Sabah (11 operasi), Sarawak (2 operasi), Wilayah Persekutuan dan Melaka (1 operasi).

Sementara itu jelas Ismail, seramai 724 rakyat Malaysia telah pulang ke tanah air melalui Lapangan Terbang Antarabangsa KLIA dan KLIA2 dari Vietnam, Indonesia, Singapura, Qatar, Emiriyah Arab Bersatu, Korea Selatan, Hong Kong, Taiwan dan Brunei pada Rabu.

"Daripada jumlah itu, 723 individu telah diperintah untuk menjalani proses kuarantin wajib di kediaman mereka manakala satu individu dibawa ke hospital," ujarnya.

Katanya lagi, pemeriksaan Lembaga Pembangunan Industri Pembinaan Malaysia (CIDB) juga mendapati 38 tapak binaan telah patuh SOP yang ditetapkan dan 5 tapak binaan tidak patuh SOP dan diberi amaran manakala 10 tapak binaan tidak beroperasi dalam operasi mereka pada Rabu.

Sementara bagi pemantauan harian bekalan barangan, penguatkuasa Kementerian Perdagangan Dalam Negeri dan Hal Ehwal Pengguna (KPDNHEP) telah membuat pemantauan harian ke atas 25 jenis bekalan barangan di 815 premis perniagaan termasuk peruncit (612), pemborong (173) dan pengilang (30).

Secara keseluruhan bekalan barangan keperluan mencukupi dan mampu menampung keperluan dalam negara yang berterusan dan mudah diperolehi.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/71-individu-ditahan-ingkar-arahan-pkpp-ismail-sabri-249504>